



Siguiendo cu e maneho di energia alternativa

Aruba ta haya un tram "berde"



ORANJESTAD(AAN): No solamente e tram of trolley ta un inovacion como un atraccion di producto Aruba, pero tambe e ta e prome vehiculo di e indole aki den Caribe pa motibo cu e ta core riba energia berde, usando bateria cu por worde recarga.

E tram no ta un proyecto riba su mes pero ta forma parti di e proyecto renobacion di Centro di Oranjestad, cu ta cay bou di e plan integral BoAruba di Gabinete Mike Eman. Na momento cu Gabinete Mike Eman a drenta den funcion a cuminsa cu implementacion di e plan di Centro di Oranjestad, cu tabatin mester di un cambio drastico pa trece e cumpradoman back den e principal caya comercial di Aruba.

E tram ta forma parti di e revitalisacion di centro di Oranjestad. Despues cu recientemente e railsnan a yega pa worde instala door di e compania MNO Vervat den e proximo dianan, e procedura ta andando pa entrega e bestek na e empresanan interesa pa participa den e destaho publico. Esaki probablemente ta cla den mas o menos dos siman, pero sigur prome

cu fin di e luna aki. Minister Sevinger, di Ministerio di Infraestructura, ta vigilando tur e proyectonan di cerca pa tur cos bay mas segun e fechan stipula. Esaki ta encera cu pa fin di aña awor, e tram ta den operacion.

Un di e condicionnan ta cu e mester uza bateria cu ta worde carga cu energia di solo of biento, cu Aruba tin basta di ambos. E Infra-Team di Minister Sevinger cu ta envolvi den e proyectonan aki, a pone cabes hunto di loke mester ta e tram cu Aruba ta bay uza y a yega na un concepto di uno habri, manera por mira riba e foto cu ta compania e articulo. E

intencion ta pa ordo tres di e vehiculonan aki cu ta carga mas o menos 70 persona cada un. Den combersacion cu Junior Tromp di Infra-Team, el a confirma cu ta bay tin tres di e vehiculonan aki, cu ta pasa cada 8 minuut y mey na e ocho paradanan cu tin. Mester corda cu e tram ta un vehiculo cu ta core masha poco-poco.

Riba e potret di e tram, por mira loke por spera con e tram di Aruba lo bay ta, cu e logo di Aruba riba dje.

Tambe e otro ilustracion: E marca diki ta ilustra e ruta cu e tram lo ta coriendo for di Haf pa centro di Oranjestad.